



# SIARAN AKHBAR

KEMENTERIAN KESIHATAN

## PERUTUSAN

**YANG BERTHORMAT**  
**DATO SERI SETIA DR HAJI MOHAMMAD ISHAM BIN HAJI JAAFAR**  
**MENTERI KESIHATAN**  
**SEMPENA HARI JURURAWAT DAN BIDAN ANTARABANGSA 2023**

**12 MEI 2023**

### TEMA:

***“Jururawat kita, Masa Depan Kita”***  
***(Our Nurses. Our Future)***

1. Setiap tahun, Hari Jururawat Antarabangsa atau *International Nurses Day (IND)* disambut pada 12 haribulan Mei dan Hari Bidan Antarabangsa atau *International Day of Midwife (IDM)* disambut pada 5 haribulan Mei. Di Negara Brunei Darussalam pula, Hari Jururawat Antarabangsa dan Hari Bidan Antarabangsa ini digabungkan dan diraikan serentak pada setiap 12 haribulan Mei dan ianya dinamakan sebagai Hari Jururawat dan Bidan Antarabangsa atau *International Nursing and Midwifery Day (INMD)*.
2. Tema Sambutan Hari Jururawat dan Bidan Antarabangsa pada tahun ini ialah ***‘Our Nurses. Our Future.’***. Tema ini disediakan oleh *International Council of Nurses (ICN)* yang mana ianya merupakan sebuah kempen yang dilaksanakan di seluruh dunia bagi kesiapsiagaan jururawat di masa hadapan dalam menangani

pelbagai cabaran kesihatan global dan meningkatkan kesihatan global untuk semua. Kempen ini juga diharap untuk menggariskan kepentingan bagi sesebuah negara, penggubal dasar dan semua yang membuat keputusan dalam pembiayaan dan penjagaan kesihatan untuk melabur kepada bidang kejururawatan dan bidan ke arah masa depan yang lebih cerah. Selain itu, kempen ini juga akan melihat bagaimana kita perlu mengukuhkan sistem kesihatan untuk menangani permintaan kesihatan global yang semakin meningkat.

3. Jururawat dan Bidan adalah pondokong kepada sistem kesihatan di dalam sesebuah negara. Profesion ini bukan saja profesion yang sangat mulia, memerlukan kesabaran dan dedikasi yang tinggi, malahan adalah satu aset yang utama yang perlu dilindungi, dihormati dan dihargai. Profesion ini telah banyak berkembang, daripada memberi perkhidmatan *'bedside nursing care'* kepada jenis tugas-tugas yang lebih kepada *'highly technical dan advanced'*. Walaupun lebih ramai Jururawat dan Bidan mempunyai latar belakang pendidikan atau *qualification* yang lebih tinggi dari sebelum ini seperti di peringkat Ijazah Sarjana Muda, Ijazah Sarjana mahupun ke peringkat Doktor Falsafah, namun sistem perkhidmatan penjagaan kesihatan juga kian pesat berkembang dan pastinya akan menempuh pelbagai cabaran. Dengan kecenderungan penggunaan I.T. dan internet di era global ini, klien dan keluarga telah terdedah kepada pengetahuan berkaitan dengan kesihatan dan perubatan yang mana, ini akan membantu mereka di dalam membuat keputusan di dalam penjagaan kesihatan mereka.

4. Justeru itu, Jururawat dan Bidan perlu sentiasa *up-to-date* mengikut trend teknologi perubatan terkini bagi mencapai harapan klien yang semakin meningkat. Jururawat dan Bidan bukan sahaja perlu fokus kepada penjagaan klien semata-mata tetapi juga kepada keluarga keseluruhannya. Di samping kompeten dalam mengaplikasikan pengetahuan, kemahiran dan teknologi, Jururawat dan Bidan juga perlu prihatin kepada nilai-nilai sosial, naluri kemanusiaan dan etika kejururawatan perlulah dikekalkan pada setiap masa.
  
5. Pihak Kementerian Kesihatan akan sentiasa berusaha untuk memperkukuhkan lagi perkhidmatan-perkhidmatan kejururawatan di negara ini. Antara inisiatif yang telah di laksanakan adalah meningkatkan pembangunan profesional Kejururawatan dengan berkolaborasi dengan pihak-pihak yang berkepentingan bagi menyediakan Jururawat yang berpengetahuan tinggi, kompeten dan sentiasa menekankan kepada kecemerlangan dan berkualiti. Melaksanakan Kursus Kepimpinan yang intensif bagi menyediakan Jururawat dengan ilmu kepimpinan dalam usaha untuk memantapkan Jururawat di negara untuk lebih dinamik dan inovatif yang bukan hanya sekadar responsif terhadap keperluan semasa malahan sentiasa siapsiaga menangani cabaran mendatang dan berterusan peka serta mengambil kira akan sebarang perubahan paradigma dan epidemiologi yang boleh mempengaruhi penjagaan kesihatan di peringkat setempat mahupun serantau dan sejagat.

Dalam hal ini juga, Kementerian Kesihatan juga mempunyai perancangan ke arah penyediaan Jururawat dan Bidan Pakar atau '*Advanced Practice Nurse*' di masa akan datang demi menangani cabaran kesihatan dan perawatan di masa hadapan.

6. Dalam meningkatkan lagi pembangunan profesional Kejururawatan dan Bidan, Kementerian Kesihatan pada masa ini telah menyediakan satu sistem pemantauan klinikal Jururawat yang lebih komprehensif dengan menekankan *Patient Safety* di setiap pelaksanaan penjagaan dan perawatan kepada pesakit selaras dengan dasar-dasar yang telah disediakan oleh Kementerian Kesihatan. Selain melibatkan diri dalam *patient safety*, Jururawat dan Bidan juga disarankan untuk meningkatkan pengetahuan dan mengamalkan *evidence-based practice*, membuat inisiatif untuk menjalankan penyelidikan dan mempraktikkannya kepada penjagaan kesihatan yang inovatif dan selamat demi mencapai tahap penjagaan yang terbaik untuk pesakit.
7. Untuk mengakhiri, Kementerian Kesihatan menyeru kepada Jururawat dan Bidan agar lebih aktif dalam penglibatan bagi meningkatkan kualiti perawatan dan keselamatan pesakit di Negara ini. Selain itu ditekankan untuk mengambil perhatian yang serius akan kepentingan pembangunan kapasiti profesional kejururawatan yang merupakan tulang belakang dan nadi utama sistem kesihatan negara ini bagi menyahut cabaran dalam mempersiapkan diri bagi

menangani kesihatan global yang sentiasa berubah bersesuaian dengan tema '*Our Nurses. Our Future*'.

**-TAMAT-**